

9. novembari 2022

UKA2022/87

Takornariaqarneq aallaavigalugu ilinniarfiusinnaasumik Ilulissani ilinniartoqarfimmik pilersitsinissamut aalajangiisoqarsinnaanissaanut tungavissanik Naalakkersuisut misissuinissaat pillugu Inatsisartut aalajangiiffigisassaattut siunnersuut. Ilinniartoqarfik minnerpaamik serviceøkonom, Arktisk Turistguide aamma Adventure Guide ilinniakkatut pigissavai. Misissuineq kingusinnerpaamik UKA 2023-mi Inatsisartunut tunniunneqassaaq.

(Inatsisartunut ilaasortaq Nivi Olsen, Demokraatit)

Siunnersuuteqartup Nivi Olsenip siunnersuutaanut Siumumit ima oqaaseqassaagut.

Takornariaqarneq nunatta aningaasarsiorfissaattut ukiorpassuarni ineriartortitassatut inersuarmi maannittaag oqaluuserineqartarsimaqaaq, sulilu pissusissamisoortumik oqaluuserineqartarluni – ullumi aamma.

Nunatsinni takornariaqarneq aqqissuussamik, taamani Namminersornerullutik Oqartussaasunit 1990-imi aallartinneqarpoq, 2005-ip tungaanut periusissiorartoqarluni. Periusissiaq taanna ukiut ingerlanerini allangortinneqartarpoq, taamaakkaluartorli ulloq manna tikillugu – sumiiffiit ataasiakkaat eqqaasangikkaanni – takornariaqarnerup ineriartornera kigaatsumik ingerlasimavoq.

Periusissiorsimagaanni periusissiorsimangikkaanniluunniit, siunissaq qaninnerusiq eqqarsaatigalu Siumumit takusinnaasorisarput unaavoq, mittarfissuit nutaat atuutsilerneqarpata takornariaqarneq malunnartumik qaffariassasoq. Taannalu pisussaq minnerpaamik piareersarsimaffiginerussagippat Siumut isumaqarpoq. Piareersarnitsinnullu qitiulluinnarpoq, inuit maani nunaqartut ajunnginnerpaamik takornariaqarnerup iluani kajumilluarlutik sulilersinnaanissaat.

Tamatumunngalu tunngatillugu una siunnersuut Siumumit isigaarput.

Pissutissaqarpugut nunap immikkoortuini takornariaqarnermut ilinniarfissanik pilersitsinissatsinnut – tamanna takornarialerisutut sulerusuttut, pingaartumillu inuusuttatta pisariaqartikkaat Siumumit qularutiginnilarput. Inuusuttatta siunissami pitsaanerpaamik ilisimasaqarfiunerpaamillu takornarianik sullissisinnaanngornissaat aqqtissiuutissagippat Siumut isumaqarpoq.



Taamaattumik Siumumit nuannaarutigaarput, Naalakkersuisut siunnersuuteqartumut naaperiaassuteqarlutik allannguutissatut siunnersuuteqarmata.

Allannguutissatut siunnersuut isumaqassaaq, Naalakkersuisut ingerlariaqqinnissamik tikkuussillutik upernaamut Inatsisartut ataatsimiinneranni saqqummiussaqaasat.

Soorunami nunaqavissut kissaataat qitiutillutigit sulineq ingerlanneqassasoq Siumup naatsorsuutigaa. Tamanna isumaqarpoq suliaq peqqissaarullugu suliarineqassasoq, soorlu nunatsinniit suliaqartussat ilinnialertussat tassaassapput atuarfimmiit aninermi kingorna takornarialerisutut ingerlaqqikkusunermik kissaateqartut.

Taama oqaaseqarluta Naalakkersuisut allannguutissatut siunnersuutaat taperserlugu ataatsimiititaliamut susassaartumut ingerlateqqinneqarnissaa kissaatigaarput.

Dines Mikaelen, Siumut